

qui estans morts a la uerité dans la grace de Dieu, ne luy auoient pas encore entierement satisfait pour leurs desordres passez; ils s'assemblerent trois fois à l'eglise le soir du iour de la toussaint pour prier dieu pour ces pauures ames qui gemissent dans les feux du purg. pour expier les restes des pechez de l'yurognerie, ie laissay l'eglise toute la nuit ouuerte, pour satisfaire a la deuotion de ceux qui souhaitteroient prier plus longtems, quoyque ie n'ordonnay à personne en particulier d'y demeurer, ie leurs proposay seulement l'exemple que leurs donnoient en cela les feruens chrestiens de la mission du Sault dont la plupart passoiēt toute cete nuit en priere pour la deliurance des ames du purgatoire nous auions couuerts une partie de nostre autel de deux grandes images des ames du purgatoire et aux deux costes deux grandes representations de la mort ie uous l'auoie encore une fois que ieu une ioye bien sensible de voir la ferueur de nos sauuages. ils auoient passé un mois auparauant, tout le iour de st. Michel patron de nostre Eglise dans une deuotion extraordinaire, i'auois inuité à Quebec toutes les personnes qui par le chant et la musique pouuoit contribuer d'auantage a la solemnité de nostre feste et nous eusmes une musique autant belle qu'elle peut estre dans ce pays, toutes les personnes que i'auois inuité ayant eu la bonté de s'y trouuer. ce fut le lendemain de St Michel que nous commençames à nous declarer fortement contre les yurogues de la maniere que ie viens de le decrire. dans la neufuaine dont iay parlé, Monseigneur nostre Euesque uouloit bien uenir dire la messe dans l'eglise de nostre mission, et il fit une exhortation